

四庫全書薈要

• 乾隆御覽本

集部

白氏長慶集卷十一

唐白居易撰

感傷三

古調詩五言凡五十三首

初入峽有感

上有萬仞山下有十丈水蒼蒼兩崖間闊狹容一葦瞿
塘呀牛加切直瀉灩澦屹中峙未夜黑巖昏無風白浪起
大石如刀劒小石如牙齒一步不可行况千三百里

峽自

州至忠州艱險相繼凡一千三百里

苒弱

如肉切

竹箴箴

音

歆危檝師趾一

跌無完舟吾生繫於此常聞仗忠信蠻貊可行矣自古漂流人豈盡非君子況吾時與命蹇舛不足恃常恐不才身復作無名死

過昭君村

村在歸州東北四十里

靈珠產無種彩雲出無根亦如彼姝子生此遐陋村至麗物難掩遽選入君門獨美衆所嫉終棄如塞垣唯此希代色豈無一顧恩事排勢須去不得由至尊白黑既

可變丹青何足論竟埋代北骨不返巴東魂慘淡晚雲
水依稀舊鄉園妍姿化已久但有村名存村中有遺老
指點為我言不取往者戒恐貽來者冤至今村女面燒
灼成癰痕

自江州至忠州

前在潯陽日已歎賓朋寡忽忽抱憂懷出門無處寫今
來轉深僻窮峽巔山下五月斷行舟灩堆正如馬巴人
類猿狖尤救切矍鑠滿山野敢望見交親喜逢似人者

初到忠州登東樓寄萬州楊八使君

山東邑居窄峽牽氣候偏林巒少平地霧雨多陰天隱

隱煮鹽火漠漠燒畬

牛居切

煙賴此東樓夕風月得脩然

憑軒望所思目斷心涓涓背春有去鴈上水無來船我
懷巴東守乃是關西賢平生已不淺流落重相怜水梗
漂萬里籠禽囚五年新恩同雨露遠郡鄰山川書信雖
往復封疆徒接連其如美人面欲見杳無緣

郡中

鄉路音信斷山城日月遲欲知州近遠堦前摘荔枝

西樓夜

悄悄復悄悄城隅隱林杪山郭燈火稀峽天星漢少年
光東流水生計南枝鳥月沒光沉沉西樓殊未曉

東樓曉

脉脉復脉脉東樓無宿客城闌雲霧多峽深田地窄宵
燈尚留燭晨禽初展翮欲知山高低不見東方白

寄王質夫

憶始識君時愛君世緣薄我亦吏王畿不為名利著

直略

切春尋仙遊洞秋上雲居閣樓觀水潺潺

鈕山切

龍潭花

漠漠吟詩石上坐引酒泉邊酌因話出處心心期老巖
壑忽從風雨別遂被簪纓縛君作出山雲我為入籠鶴
籠深鶴憔悴山遠雲飄泊去處雖不同同負平生約今
來各何在老去隨所託我守巴南城君佐征西幕年顏
漸衰颯

悉合切

生計仍蕭索方含去國愁且羨從軍樂

洛音

舊遊疑是夢往事思如昨相憶春又深故山花正落

南賓郡齋即事寄楊萬州

山上巴子城山下巴江水中
有窮獨人強名為刺史時
時竊自哂刺史豈如是倉粟
餒家人黃縑裹妻子

忠州刺史

已下悉以畬田粟
給祿食黃絹支俸

莓苔翳冠帶霧雨霾

音埋雨土
蒙茂也

樓雉

衙鼓暮復朝郡齋卧還起
回首望南浦亦在煙波裏而
我復何嗟夫君猶滯此

招蕭處士

峽內豈無人所逢非所思
門前亦有客相對不相知
仰

望但雲樹俯顧惟妻兒寢食起居外端然無所為東郊
蕭處士聊可與開眉能飲滿杯酒善吟長句詩庭前吏
散後江畔路乾時請君攜竹杖一起郡齋期

庭槐

南方饒竹樹唯有青槐稀十種七八死縱活亦支離何
此郡庭下一株獨華滋蒙蒙碧煙葉嫋嫋黃花枝我家
渭水上此樹陰前墀忽向天涯見憶在故園時人生有
情感遇物牽所思樹木猶復爾況見舊親知

送客回晚興

城上雲霧開沙頭風浪定參差亂山出淡沔平江淨行
客舟已遠居人酒初醒嫋嫋秋竹梢已蟬聲似磬

東樓竹

瀟灑城東樓遶樓多修竹森然一萬竿白粉封青玉捲
簾睡初覺欹枕看未足影轉色入樓牀席生浮綠空城
絕賓客向夕彌幽獨樓上夜不歸此君留我宿

九日登巴臺

黍香酒初熟菊暖花未開閒聽竹枝曲淺酌茱萸杯去
年重陽日漂泊湓城隈今歲重陽日蕭條巴子臺旅鬢
尋已白鄉書久不來臨觴一搔首座客亦徘徊

東城尋春

老色日上面歡情日去心今既不如昔後當不如今今
猶未甚衰每事力可任花時仍愛出酒後尚能吟但恐
如此興亦隨日消沉東城春欲老勉強一來尋

江上送客

江花已萎絕江草已消歇遠客何處歸孤舟今日發杜
鵲聲似哭湘竹斑如血共是多感人仍為此中別

桐花

春令有常候清明桐始發何此巴峽中桐花開十月豈
伊物理變信是土宜別地氣反寒暄天時倒生殺草木
堅強物所稟固難奪風候一參差榮枯遂乖刺郎達切況
吾北人性不耐乃帶切南方熱強羸壽夭間安得依時節

早祭風伯因懷李十一舍人

遠郡雖褊陋時祀奉朝經夙興祭風伯天氣曉冥冥導
騎與從吏引我出東垆洵熒切水霧重如雨山火高於星
忽憶早朝日與君趨紫庭步登龍尾道却望終南青一
別身向老所思心未寧至今想在耳玉音尚玲玲

花下對酒二首

鵲鵲江氣春南賓閏正月梅櫻與桃杏次第城上發紅
房爛簇火素豔紛團雪香惜委風飄愁牽壓枝折樓中
老太守頭上新白髮冷淡病心情暄和好時節故園音

信斷遠郡親賓絕欲問花前樽依然為誰設

引手攀紅櫻紅櫻落似霰

先見切

仰首看白日白日委如

箭年芳與時景頃刻猶衰變況是血肉身安能長强健
人心苦迷執慕貴憂貧賤愁色常在眉歡容不上面况
吾頭半白把鏡非不見何必花下杯更待他人勸

不二門

兩眼日將闇四肢漸衰瘦東帶賸

以証切

昔圍穿衣妨

去聲

寬袖流年似江水奔注無昏晝志氣與形骸安得長依

舊亦曾登玉陛舉措多紕切繆至今金闕籍名姓獨

遺漏亦曾燒大藥消息乖火候至今殘丹砂燒乾不成
就行藏事兩失憂惱心交關化作顛賴翁拋身在荒陋
坐看老病逼湏得醫王救唯有不二門其間無夭壽

我身

我身何所似似彼孤生蓬秋霜剪根斷浩浩隨長風昔
於秦雍間今落巴蠻中昔為意氣郎今作寂寞翁外貌
雖寂寞中懷頗冲融賦命有厚薄委心任窮通通當為

大鵬舉翅摩蒼穹窮則為鷦鷯一枝足自容苟知此道者身窮心不窮

哭王質夫

仙遊寺前別別來十年餘生別猶怏怏死別復何如客從梓潼來道君死不虛驚疑心未信欲哭復踟蹰踟蹰寢門側聲發淚亦俱衣上今日淚篋中前月書牋君古人風重有君子儒篇詠陶謝輩風襟嵇阮徒出身既塞屯生世仍須臾誠知天至高安得不一呼江南有毒蟒

江北有妖狐皆享千年壽多於王質夫不知彼何德不識此何辜

東坡種花二首

持錢買花樹城東坡上栽但構有花者不限桃杏梅百果參雜種千枝次第開天時有早晚地力無高低紅者霞豔豔白者雪皚皚

魚開切

遊蜂逐不去好鳥亦栖來前

有長流水下有小平臺時拂臺上石一舉風前杯花枝

陰我頭花蕊

如累切俗作蕊

落我懷獨酌復獨詠不覺月平

西巴俗不愛花竟春無人來唯此醉太守盡日不能迴
東坡春向暮樹木今何如漠漠花落盡翳翳葉生初每
日領童僕荷鋤仍決渠楚簡切土壅其本引泉溉其枯
小樹低數尺大樹長丈餘封植未幾時高下齊扶踈養
樹既如此養民亦何殊將欲茂枝葉必先救根株云何
救根株勸農均賦租云何茂枝葉省事寬刑書移此為
郡政庶幾毗俗蘇

登城東古臺

迢迢東郊上有土青崔嵬不知何代物疑是巴王臺巴
歌久無聲巴宮沒黃埃靡靡春草合牛羊緣四隈我來
一登眺目極心悠哉始見江山勢峰疊水環迴憑高視
聽曠向遠冒襟開唯有故園念時時東北來

哭諸故人因寄元九

昨日哭寢門今日哭寢門借問所哭誰無非故交親偉
卿既長往質夫亦幽淪屈指數年世收涕自思身彼皆
少於我先為泉下人我今頭半白焉得身久存好懷元

郎中相識二十春昔見君生子今聞君抱孫存者盡老大逝者已成塵早晚升平宅開眉一見君

郡中春宴因贈諸客

僕本儒家子待詔金馬門忝塵親近地孤負聖明恩一旦奉優詔萬里牧遠人可憐島夷帥自稱為使君身騎牂牁馬口食塗江鱗闇淡緋衫故爛斑白髮新是時歲二月玉厯布春分頒條示皇澤命宴及良辰冉冉趨府吏蚩蚩聚州民有如蟄蟲鳥亦應天地春薰草席鋪坐

藤枝酒注樽中庭無平地高下隨所陳
蠶鼓聲坎坎巴女舞蹲蹲使君居上頭
掩口語衆賓勿笑風俗陋勿欺官府貧
蜂巢與蟻穴隨分有君臣

開元寺東池早春

池水暖溫暾

他昆切

水清波潏

力丹切

濫

以丹切

簇簇青泥中

新蒲葉如劒梅房小白裹柳彩輕黃
染順氣草薰薰適

情鷗汎汎舊遊成夢寐往事隨陽焮

以丹切

芳物感幽懷

一動平生念

東澗種柳

野性愛栽植植柳水中坻

陳知切

乘春持斧斫裁截而樹

之長短既不一高下隨所宜倚岨埋大幹臨流插小枝
松栢不可待梗柟固難移不如種此樹此樹易榮滋無
根亦可活成陰況非遲三年未離郡可以見依依種罷
水邊憇仰頭閒自思富貴本非望功名須待時不種東
溪柳端坐欲何為

卧小齋

朝起視事畢晏坐飽食終散步長廊下卧退小齋中拙
政自多暇幽情誰與同孰云二千石心如田野翁

步東坡

朝上東坡步夕上東坡步東坡何所愛愛此新成樹種
植當歲初滋榮及春暮信意取次栽無行亦無數綠陰
斜景轉芳氣微風度新葉鳥下來萎花蝶飛去閒攜斑
竹杖徐曳黃麻屨欲識往來頻青苔成白路

徵秋稅畢題郡南亭

高城直下視蠡蠹見巴蠻安可施政教尚不通語言且
喜賦歛畢幸聞閭井安豈伊循良比賴此豐登年案牘
既簡少池館亦清閒秋雨簷果落夕鐘林鳥還南亭日
瀟灑偃卧恣疎頑

蚊蟆

巴徼炎毒早二月蚊蟆生

作答切

膚拂不去遠耳薨薨

聲斯物頗微細中人初甚輕如有膚受譖久則瘡痂

羽委

切成瘡成無奈何所要防其萌麼蟲何足道潛諭做人

情

登龍昌上寺望江南山懷錢舍人

騎馬出西郭悠悠欲何之獨上高寺去一與白雲期
虛檻晚瀟灑前山碧參差忽似青龍閣同望玉峰時
因詠松雪句永懷鸞鶴姿六年不相見況乃隔榮衰

昔嘗與錢舍人

登青龍寺上方同望藍田山閣有絕句
云偶來上寺因高望松雪分明見舊山

郊下

西日照高樹樹頭子規鳴東風吹野水水畔江籬生
盡

日看山立有時尋澗行兀兀長如此何許似專城

遣懷

樂往必悲生泰來猶否極誰言此數然吾道何終塞嘗
求詹尹卜拂龜竟默默亦曾仰問天天但蒼蒼色自茲
唯委命名利心雙息近日轉安閒鄉園亦休憶回看世
間苦苦在求不得我今無所求庶離憂悲域

歲晚

霜降水返壑風落木歸山冉冉歲將晏物皆復本源何

此南遷客五年獨未還命迭分已定日久心彌安亦嘗
心與口靜念私自言去國固非樂歸鄉未必歡何須自
生苦捨易求其難

負冬日

杲杲冬日出照我屋南隅負暄閉目坐和氣生肌膚初
似飲醇醪又如蟄者蘇外融百骸暢中適一念無曠然
忘所在心與虛空俱

委順

山城雖荒蕪竹樹有嘉色郡俸誠不多亦足充衣食外
累由心起心寧累自息尚欲忘家鄉誰能算官職宜懷
齊遠近委順隨南北歸去誠可憐天涯住亦得

宿溪翁

時初除郎
官赴朝

衆心愛金玉衆口貪酒肉何此溪上翁飲瓢亦自足溪
南刈薪草溪北修墻屋歲種一頃田春驅兩黃犢於中
甚安適此外無營欲溪畔偶相逢菴中遂同宿醉翁向
朝市問我何官祿虛言笑殺翁郎官應列宿

重過壽泉憶與楊九別時因題店壁

商州南十里有水名壽泉湧出石崖下流經山店前憶
昔相送日我去君言還寒波與老淚此地共潺湲一去
歷萬里再來經六年形容已變改處所猶依然他日君
過此慇懃吟此篇

西掖早秋直夜書意

自此後中書
舍人時作

涼風起禁掖新月生宮沼夜半秋闈來萬年枝嫋嫋炎
涼遞時節鐘鼓交昏曉遇聖惜年衰報恩愁力小素餐

無補益朱綬虛纏繞冠蓋栖野雲
耨梁養山鳥量力私自省所得已
非少五品不為賤五十不為夭若
無知足心貪求何日了

庭松

堂下何所有十松當我階
亂立無行次高下亦不齊
高者三丈長下者十尺低
有如野生物不知何人栽
接以青丸屋承之白沙臺
朝昏有風月燥濕無塵泥
踈韻秋檄檄止戟切
涼陰夏淒淒春深微雨夕
滿葉珠蓑蓑

隕落貌

蘇四

切歲暮大雪天壓枝玉皚皚

魚開切

四時各有趣萬木非

其儕去年買此宅多為人所咤

呼來切

一家二十口移轉

就松來移來有何得但得煩襟開即此是益友豈必交

賢才顧我猶俗士冠蓋走塵埃未稱為松主時時一愧

懷

竹窓

常愛輞川寺竹窓東北廊一別十餘載見竹未曾忘今
春二月初卜居在新昌未暇作廩庫且先營一堂開窓

不糊紙種竹不依行意取北簷下窓與竹相當遠屋聲
浙浙逼人色蒼蒼煙通杳靄氣月透玲瓏光是時三伏
天天氣熱如湯獨此竹窓下朝迴解衣裳輕紗一幅巾
小簾六尺牀無客盡日靜有風終夜涼乃知前古人言
事頗諳詳清風北窓卧可以傲羲皇

同韓侍郎遊鄭家池吟詩小飲

野艇容三人晚池流浼浼

莫賄切

悠然依棹坐水思如江

海宿雨洗沙塵晴風蕩煙靄殘陽上竹樹枝葉生光彩

我本偶然來景物如相待白鷗驚不起綠芡行堪採
齒髮雖已衰性靈未云改逢詩遇杯酒尚有心情在

晚歸有感

朝弔李家孤暮問崔家疾

時李十一侍御諸子尚居憂崔二十二貧外三年卧病

回馬獨歸來低眉心鬱鬱平生所善者多不過六七如
何十年間零落三無一劉曾夢中見元向花前失

劉三十二

校書段後嘗夢見之元八少尹今春櫻桃花時長逝漸老與誰遊春城好風日

曲江感秋二首

并序

元和二年三年四年予每歲有曲江感秋詩凡三篇編
在第七集卷是時予為左拾遺翰林學士無何貶江州
司馬忠州刺史前年遷主客郎中知制誥未周歲授中
書舍人今遊曲江又值秋日風物不改人事屢變況予
中否後遇昔壯今衰慨然感懷復有此作噫人生多故
不知明年秋又何許也時二年七月十日云耳

元和二年秋我年三十七長慶二年秋我年五十一中
間十四年六年居譴黜窮通與榮悴委運隨外物遂師

廬山遠重弔湘江屈夜聽竹枝愁秋看瀝堆沒近辭巴
郡印又秉綸闈筆晚遇何足言白髮映朱綬消沉昔意
氣改換舊容質獨有曲江秋風煙如往日

疎蕪南岼草蕭颯西風樹秋到未幾時蟬聲又無數莎
平綠茸合蓮落青房露今日臨望時往年感秋處池中
水依舊城上山如故獨我鬢間毛昔黑今垂素榮名與
壯齒相避如朝暮時命始欲來年顏已先去當春不歡
樂臨老徒驚悞故作詠懷詩題於曲江路

翫松竹二首

龍蛇隱大澤麋鹿遊豐草
栖鳳安於梧潛魚樂於藻
吾亦愛吾廬廬中樂吾道
前松後修竹偃卧可終老
各附其所安不知他物好

坐愛前簷前卧愛北窓北
窓竹多好風檐松有嘉色
幽懷一以合雜念隨緣息
在爾雖無情於予即有得
乃知性相近不必動與植

衰病無趣因吟所懷

朝餐多不飽夜卧常少睡自覺寢食間多無少年味平生好詩酒今亦將捨棄酒唯下藥飲無復曾歡醉詩多聽人吟自不題一字病姿與衰相日夜相繼至况當尚少朝彌慙居近侍終當求一郡聚少漁樵費合口便歸山不問人間事


逍遙詠

亦莫戀此身亦莫厭此身此身何足戀萬劫煩惱根此身何足厭一聚虛空塵無戀亦無厭始是逍遙人

白氏長慶集卷十一

謹案卷十第一頁前六行徐州古豐縣刊本豐訛

澧據全唐詩改



總校官庶吉士臣張能照

校對官編修臣莫瞻某

校對官編修臣沈清藻

謄錄監生臣平達

謄錄監生臣劉震

欽定四庫全書薈要

集部

白氏長慶集卷十二

詳校官助教日常循



白氏長慶集卷十二

唐白居易撰

感傷四

詩行曲引雜體凡二十九首

短歌行

瞳瞳

徒紀切

太陽如火色上行千里下一刻出為白晝入

為夜圓轉如珠住不得住不得無奈何為君舉酒誦短
歌歌聲苦詞亦苦四座少年君聽取今夕未竟明夕催

秋風纔往春風回人無根蒂時不駐朱顏白日相隳頽
勸君且強笑一面勸君且強飲一杯人生不得長歡樂
年少須臾老到來

生離別

食檠不易食梅難檠能苦兮梅能酸未如生別之為難
苦在心兮酸在肝晨鷄再鳴殘月沒征馬連嘶行人出
回看骨肉哭一聲梅酸檠苦甘如蜜黃河水白黃雲秋
行人河邊相對愁天寒野曠何處宿棠梨葉戰風颼颼

疏鳩切

生離別生離別憂從中來無斷絕憂極心勞血氣

衰末年三十生白髮

浩謫行

天長地久無終畢昨夜今朝又明日鬢髮蒼浪牙齒疎
不覺身年四十七前去五十有幾年把鏡照面心茫然
既無長繩繫白日又無大藥駐朱顏朱顏日漸不如故
青史功名在何處欲留年少待富貴富貴不來年少去
去復去兮如長河東流赴海無迴波賢愚貴賤同歸盡

北邙塚墓高嵯峨古來如此非獨我未死有酒且高歌
顏回短命伯夷餓我今所得亦已多功名富貴須待命
命若不來知奈何

王夫子

王夫子送君為一尉東南三千五百里道途雖遠位雖
卑月俸猶堪活妻子男兒口讀古人書束帶斂手來從
事近將徇祿給一家遠則行道佐時理行道佐時須待
命委身下位無為恥命苟未來且求食官無卑高及遠

過男兒上既未能濟天下下又不至饑寒死吾觀九品
至一品其間氣味都相似紫綬朱綬青布衫顏色不同
而已矣王夫子別有一事欲勸君逢酒逢春且歡喜

江南遇天寶樂史

白頭老叟泣且言祿山未亂入梨園能彈琵琶和法曲
多在華清隨至尊是時天下太平久年年十月坐朝元
千官起居環珮合萬國會同車馬奔金殿照耀石甕寺
蘭麝熏煮溫湯源貴妃宛轉侍君側體弱不勝珠翠繁

冬雪飄飄錦袍暖春風蕩漾霓裳翻歡娛未足燕寇至
弓勁馬肥胡語喧幽土人遷避夷狄鼎湖龍去哭軒轅
從此漂淪到南土萬人死盡一身存秋風江上浪無限
暮雨舟中酒一樽涸魚久失風波勢枯草曾沾雨露恩
我自秦來君莫問驪山渭水如荒村新豐樹老籠明月
長生殿閤鎖春雲紅葉紛紛蓋歌瓦綠苔重重封壞垣
唯有中官作宮使每年寒食一開門

送張山人歸嵩陽

黃昏慘慘天微雪修行坊西鼓聲絕張生馬瘦衣且單
夜扣柴門與我別媿君冒寒來別我為君沽酒張燈火
酒酣火暖與君言何事出關又入關答云前年偶下山
四十餘月客長安長安古來名利地空手無金行路難
朝遊九城陌肥馬輕車欺殺客暮宿五侯門殘茶冷酒
愁殺人春明門門前便是嵩山路幸有雲泉容此身明
日辭君且歸去

醉後走筆酬劉五主簿長句之贈兼簡張大賈

二十四先輩昆季

劉兄文高行孤立十五年前名翕習是時相遇在符離
我年二十君三十得意忘年心迹親寓居同縣日知聞
衡門寂寞朝尋我古寺蕭條暮訪君朝來暮去多攜手
窮巷貧居何所有秋燈夜寫聯句詩春雪朝傾煖寒酒
埤滿康切湖綠愛白鷗飛灘蘇回切水清憐紅鯉肥偶語閒
攀芳樹立相扶醉蹋落花歸張賈弟兄同里巷乘閒數
數來相訪雨天連宿草堂中月夜徐行石橋上我年漸

長忽自驚鏡中冉冉髭鬚生心畏後時同勵志身牽前
事各求名問我棲棲何所適鄉人薦為鹿鳴客二千里
外謝交游三十韻詩慰行役出門可憐唯一身弊裘瘦馬
入咸秦瑟瑟街鼓紅塵闇晚到長安無主人二賈二張
與余弟驅車邈良以迤切延知來相繼操詞握賦為干戈

鋒銳森然勝氣多同入文場多苦戰五人十載九登科
二張得雋名居甲美退爭雄重告捷棠棣輝榮並桂枝
芝蘭芬馥和荆葉唯有沅犀屈未伸握中自謂駭難珍

三年不鳴鳴必大豈獨駭雞當駭人元和運氣千年聖
同遇明時余最幸始辭秘閣吏王畿遽列諫垣升禁闥
蹇步何堪鳴珮玉衰容不稱着朝衣間闔晨開朝百辟
冤旒不動香煙碧步登龍尾上虛空立去天顏無咫尺
宮花似雪從乘輿禁月如霜坐直廬身賤每驚隨內宴
才微常愧草天書晚松寒竹新昌第職居密近門多閉
日暮銀臺下直回故人到門門暫開回頭下馬一相顧
塵土滿衣何處來斂手炎涼叙未畢先說舊山今悔出

岐陽旅宦少歡娛江左遷遊費時日贈我一篇行路吟
吟之句句披沙金歲月徒催白髮貌泥塗不屈青雲心
誰謂茫茫天地意短才獲用長才棄我隨鷓鴣入煙雲
謬上丹墀為近臣君同鸞鳳棲荆棘猶著青袍作選人
惆悵知賢不能薦徒為出入蓬萊殿月慚諫紙二百張
歲愧俸錢三十萬大底浮榮何足道幾度相逢即身老
且傾斗酒慰羈愁重話符離問舊遊北巷鄰居幾家去
東林舊院何人住武里村花落復開流溝山色應如故

感此酬君千字詩，醉中分手又何之。
須知通塞尋常事，莫歎浮沉先後時。
慷慨臨歧重相勉，殷勤別後加餐飯。
君不見買臣衣錦還故鄉，五十身榮未為晚。

和錢員外答盧員外早春獨遊曲江見寄長句

春來有色闇融融，先到詩情酒思中。
柳岸霏微裊_{乙業切}春來有色闇融融，先到詩情酒思中。
柳岸霏微裊

塵雨杏園淡蕩開花風，聞君獨遊心鬱鬱。
薄晚新晴騎馬出，醉思詩侶有同年。
春歎翰林無暇日，雲夫首倡寒玉音。
蔚章繼和春搜吟，此時我亦閉門坐。
一日風光三

處心

雲夫蔚章同年及第時
予與蔚章同在翰林

東壚晚歇

時退居
渭村

涼風冷露蕭索天黃蒿紫菊荒涼田遠塚秋花少顏色
細蟲小蝶飛翻翻中有騰騰獨行者手挂魚竿不騎馬
晚從南澗釣魚回歇此壚中白楊下褐衣半故白髮新
人逢知我是何人誰言渭浦棲遲客曾作甘泉侍從臣

客中月

客從江南來來時月上弦悠悠行旅中三見清光圓曉

隨殘月行夕與新月宿誰謂月無情千里遠相逐朝發
渭水橋暮入長安陌不知今夜月又作誰家客

挽歌詞

丹旌何飛揚素驂亦悲鳴晨光照閭巷輶音而車儼欲行

蕭條九月天哀挽出重城借問送者誰妻子與弟兄蒼

蒼上古原峨峨開新塋含酸一慟哭異口同哀聲舊壠

轉蕪絕新墳日羅列春風草綠北邙山此地年年生死

別

長相思

九月西風興月冷霜華凝思君秋夜長一夜魂九升二
月東風來草折花心開思君春日遲一日腸九迴妾住
洛橋北君住洛橋南十五即相識今年二十三有如女
蘿草生在松之側蔓短枝苦高縈迴上不得人言人有
願願至天必成願作遠方獸步步比肩行願作深山水
枝枝連理生

山鷓鴣

山鷓鴣朝朝暮暮啼復啼時露白風淒淒
黃茅岡頭秋日晚苦竹嶺下寒月低
畬田有粟何不啄石楠有枝何不棲
迢迢不緩復不急樓上舟中聲聞入夢鄉
遷客展轉卧抱兒寡婦彷徨立山鷓鴣
爾本此鄉鳥生不辭巢不別群何苦聲
聲啼到曉啼到曉唯能愁北人南人慣
聞如不聞

放旅鴈

元和十
年冬作

九江十年冬大雪江水生冰樹枝折百鳥無食東西飛

中有旅鴈聲最饑雪中啄草冰上宿翅冷騰空飛動遲
江童持網捕將去手攜入市生賣之我本北人今謫謫
人鳥雖殊同是客見此客鳥傷客人贖汝放汝飛入雲
鴈鴈汝飛向何處第一莫飛西北去淮西有賊討未平
百萬甲兵久屯聚官軍賊軍相守老食盡兵窮將及汝
健兒饑餓射汝啐拔汝翅翎為箭羽

送春歸

元和十一年三月三十日作

送春歸三月盡日日暮時去年杏園花飛御溝綠何處

送春曲江曲今年杜鵑花落子規啼送春何處西江西
帝城送春猶怏怏天涯送春能不加惆悵莫惆悵送春
人冗負無替五年罷應須準擬再送潯陽春五年炎涼
凡十變安知此身健不健好送今年江上春明年未死
還相見

山石榴寄元九

山石榴一名山躑躅一名杜鵑花杜鵑啼時花撲撲九
江三月杜鵑來一聲催得一枝開江城上佐閒無事山

下斲^{之六切}得廳前栽爛熳一欄十八樹根株有數花無數

千房萬葉一時新嫩紫殷紅鮮翅塵淚痕裏^{乙業切}損^切臉

脂臉剪刀裁破紅綃巾謫仙初墮愁在世姍^{齒下切}

^{少女也}

女新嫁嬌泥^{去聲}春日射血珠將滴地風翻焰火欲燒人

閒折兩枝持在手細看不似人間有花中此物是西施

芙蓉芍藥皆嫫母奇芳絕豔別者誰通州遷客元拾遺

拾遺初貶江陵去去時正值青春暮商山秦嶺愁殺人

山石榴花紅夾路題詩報我何所云若云色似石榴裙

當時叢畔唯思我今日欄前只憶君
憶君不見坐銷落日西風起紅紛紛

畫竹歌

并序

協律郎蕭悦善畫竹舉時無倫蕭亦甚自秘重有終歲
求其一竿一枝而不得者知予天與好事忽寫一十五
竿惠然見投予厚其意高其藝無以答貺作歌以報之
凡一百八十六字云

植物之中竹難寫古今雖畫無似者蕭郎下筆獨逼真

丹青以來唯一人
人畫竹身肥擁腫蕭
畫莖瘦節節竦
人畫竹梢死羸垂蕭
畫枝活葉葉動不根
而生從意生
不笋而成由筆成野
塘水邊碕

渠宜切

岼側森森兩叢十

五莖嬋娟不失筠粉
態蕭颯盡得風煙情
舉頭忽看不似畫低
耳靜聽疑有聲西叢
七莖勁而健省向天
竺寺前石上見東叢
八莖疎且寒曾憶湘
妃廟裏雨中看幽姿
遠思少人別與君相
顧空長歎蕭郎蕭郎
老可惜手顫

六舌切

眼昏頭雪色自言便是絕筆時從今此竹猶難

得

真娘墓

墓在虎丘寺

真娘墓虎丘道不識真娘鏡中面
唯見真娘墓頭草
霜摧桃李風折蓮
真娘死時猶少年
脂膚美手不牢固
世間尤物難留連
難留連易銷歇
塞北花江南雪

長恨歌

漢皇重色思傾國
御宇多年求不得
楊家有女初長成
養在深閨人未識
天生麗質難自棄
一朝選在君王側

回頭一笑百媚生六宮粉黛無顏色春寒賜浴華清池

溫泉水滑洗凝脂侍兒扶起嬌無力始是新承恩澤時

雲鬢花顏金步搖芙蓉帳暖度春宵春宵苦短日高起

從此君王不早朝承歡侍宴無閒暇春從春遊夜專夜

後宮佳麗三千人三千寵愛在一身金屋粧成嬌侍夜

玉樓宴罷醉和春姊妹弟兄皆列土可憐光彩生門戶

遂令天下父母心不重生男重生女驪宮高處入青雲

仙樂風飄處處聞緩歌謾舞凝絲竹盡日君王看不足

漁陽鞞鼓動地來驚破霓裳羽衣曲九重城闕煙塵生
千乘萬騎西南行翠華搖搖行復止西出都門百餘里
六軍不發無奈何宛轉蛾眉馬前死花鈿委地無人收
翠翹金雀玉搔頭君王掩面救不得回首血淚相和流
黃埃散漫風蕭索雲棧縈紆登劒閣峨眉山下少人行
旌旗無光日色薄蜀江水碧蜀山青聖主朝朝暮暮情
行宮見月傷心色夜雨聞鈴腸斷聲天旋地轉迴龍馭
到此躊躇不能去馬嵬坡下泥土中不見玉顏空死處

君臣相顧盡沾衣東望都門信馬歸歸來池苑皆依舊
太液芙蓉未央柳芙蓉如面柳如眉對此如何不淚垂
春風桃李花開夜秋雨梧桐葉落時西宮南苑多秋草
落葉滿階紅不掃梨園弟子白髮新椒房阿監青娥老
夕殿螢飛思悄然孤燈挑盡未成眠遲遲鐘鼓初長夜
耿耿星河欲曙天鴛鴦瓦冷霜華重翡翠衾寒誰與共
悠悠生死別經年魂魄不曾來入夢臨邛道士鴻都客
能以精誠致魂魄為感君王展轉思遂教方士慇懃覓

排空馭氣奔如電升天入地求之遍上窮碧落下黃泉
兩處茫茫皆不見忽聞海上有仙山山在虛無縹緲間
樓閣玲瓏五雲起其中綽約多仙子中有一人字太真
雪膚花貌參差是金闕西廂叩玉扃轉教小玉報雙成
聞道漢家天子使九華帳裡夢魂驚攬衣推枕起徘徊
珠箔銀屏邈迤開雲鬢半偏新睡覺花冠不整下堂來
風吹仙袂飄飄舉猶似霓裳羽衣舞玉容寂寞淚闌干
梨花一枝春帶雨含情凝涕謝君王一別音容兩渺茫

昭陽殿裡恩愛絕蓬萊宮中日月長
回頭下望人寰處
不見長安見塵霧
唯將舊物表深情
鈿合金釵寄將去
釵留一股合一扇
釵擘黃金合分鈿
但令心似金鈿堅
天上人間會相見
臨別殷勤重寄詞
詞中有誓兩心知
七月七日長生殿
夜半無人私語時
在天願作比翼鳥
在地願為連理枝
天長地久有時盡
此恨綿綿無絕期

附長恨歌傳

前進士陳鴻撰

開元中泰階平四海無事玄宗在位歲久倦于旰食

宵衣政無小大始委于右丞相深居遊宴以聲色自
娛先是元獻皇后武淑妃皆有寵相次即世宮中雖
良家子千數無可悅目者上心忽忽不樂時每歲十
月駕幸華清宮內外命婦熠燿景從浴日餘波賜以
湯沐春風靈液淡蕩其間上心油然若有顧遇左右
前後粉色如土詔高力士潛搜外宮得弘農楊玄琰
女子壽邸既笄矣忍切髮膩理纖穠中度舉止閑
冶如漢武帝李夫人別疏湯泉詔賜澡瑩既出水體

弱力微若不任羅綺光彩煥發轉動照人上甚悅進
見之日奏霓裳羽衣曲以導之定情之日授金釵鈿
合以固之又命戴步搖垂金鐙明年冊為貴妃半后
服用繇是治其容敏其詞婉嬾萬態以中上意上益
嬖焉時省風九州泥金五嶽驪山雪夜上陽春朝與
上行同室宴專席寢專房雖有三夫人九嬪二十七
世婦八十一御妻暨後宮才人樂府妓女使天子無
顧盼意自是六宮無復進幸者非徒殊豔尤態致是

盖才智明慧善巧便佞先意希旨有不可形容者叔父昆弟皆列在清貴爵為通侯姊妹封國夫人富埒王室車服邸第與太長公主侔而恩澤勢力則又過之出入禁門不問京師長吏為側目故當時謠詠有云生女勿悲酸生男勿喜歡又曰男不封侯女作妃看女却為門上楣其人心羨慕如此天寶末兄國忠盜丞相位愚弄國柄及安祿山引兵向關以討楊氏為辭潼關不守翠華南幸出咸陽道次馬嵬亭六軍

徘徊持戟不進從官郎吏伏上馬前請誅錯以謝天
下國忠奉釐纓盤水死於道周左右之意未快上問
之當時敢言者請以貴妃塞天下怒上知不免而不
忍見其死反袂掩面使牽之而去蒼黃展轉竟就絕
於尺組之下既而玄宗狩成都肅宗受禪靈武明年
大兇歸元大駕還都尊玄宗為太上皇就養南宮遷
于西內時移事去樂盡悲來每至春之日冬之夜池
蓮夏開宮槐秋落梨園弟子玉琯發音聞霓裳羽衣

一聲則天顏不怡左右歔歔三載一意其念不衰求之
夢魂杳不能得適有道士自蜀來知上意心念楊妃
如是自言有李少君之術玄宗大喜命致其神方士
乃竭其術以索之不至又能遊神馭氣出天界沒地
府以求之不見又旁求四虛上下東極大海跨蓬壺
見最高仙山上多樓闕西廂下有洞戶東向闔其門
署曰玉妃太真院方士抽簪扣扉有雙童女出應問
方士造次未及言而雙鬟復入俄有碧衣侍女又至

詰其所從方士因稱唐天子使者且致其命碧衣云
玉妃方寢請少待之于時雲海沉沉洞天日曉瓊戶
重闔悄然無聲方士屏息斂足拱手門下久之而碧
衣延入且曰玉妃出見一人冠金蓮披紫綃珮紅玉
曳鳳舄左右侍者七八人揖方士問皇帝安否次問
天寶十四年已還事言訖憫然指碧衣取金釵鈿合
各析其半授使者曰為謝太上皇謹獻是物尋舊好
也方士受辭與信將行色有不足玉妃固徵其意復

前跪致詞請當時一事不為他人聞者驗於太上皇
不然恐鈿合金釵負新垣平之詐也王妃茫然退立
若有所思徐而言之曰昔天寶十載侍駕避暑驪山
宮秋七月牽牛織女相見之夕秦人風俗是夜張錦
綉陳飲食瓜果焚香于庭號為乞巧宮掖間猶尚之
夜殆半休侍衛於東西廂獨侍上上凭肩而立因仰
天感牛女事密相誓心願世世為夫婦言畢執手各
嗚咽此獨君王知之耳因自悲曰由此一念又不得

居此復墮下界且結後緣或為天或為人決再相見
好合如舊因言太上皇亦不久人世幸唯自安無自
苦耳使者還奏太上皇皇心震悼日日不豫其年夏
四月南宮宴駕元和元年冬十二月太原白樂天自
授書郎尉于盤屋鴻與瑯琊王質夫家于是邑暇日
相攜遊仙遊寺話及此事相與感歎質夫舉酒于樂
天前曰夫希代之事非遇出世之才潤色之則與時
消沒不聞于世樂天深於詩多於情者也試為歌之

如何樂天因為長恨歌意者不但感其事亦欲懲尤
物窒亂階垂于將來也歌既成使鴻傳焉世所不聞
者予非開元遺民不得知世所知者有玄宗本紀在
今但傳長恨歌云爾

婦人苦

蟬鬢加意梳蛾眉用心掃幾度曉粧成君看不言好妾
身重同穴君意輕偕老惆悵去年來心知未能道今朝
一開口語少意何深願引他時事移君此日心人言夫

婦親義合如一身及至死生際何曾苦樂均婦人一喪
夫終身守孤子有如林中竹忽被風吹折一折不重生
枯死猶抱節男兒若喪婦能不暫傷情應似門前柳逢
春易發榮風吹一枝折還有一枝生為君委曲言願君
再三聽須知婦人苦從此莫相輕

長安道

花枝缺處青樓開豔歌一曲酒一盃美人勸我急行樂
自古朱顏不再來君不見外州官客長安道一迴來時

一迴老

潛別離

不得哭潛別離不得語閨相思兩心之外無人知深籠
夜鎖獨棲鳥利劍春斷連理枝河水雖濁有清日烏頭
雖黑有白時唯有潛離與閨別彼此甘心無後期

隔浦蓮

隔浦愛紅蓮昨日看猶在夜來風吹落只得一回採花
開雖有明年期復愁明年還暫時

寒食野望吟

丘墟郭門外寒食誰家哭
風吹曠野紙錢飛古墓累累
春草綠棠梨花映白楊樹
盡是死生離別處
冥漠重泉哭不聞
瀟瀟暮雨人歸去

琵琶引

井序

元和十年予左遷九江郡司馬
明年秋送客湓浦口聞
舟中夜彈琵琶者聽其音
錚錚然有京都聲問其人本
長安娼女嘗學琵琶於穆曹二善才
年長色衰委身為

賈人婦遂命酒使快彈數曲曲罷憫然自叙少小時歡樂事今漂淪憔悴轉徙於江湖間予出官二年恬然自安感斯人言是夕始覺有遷謫意因為長句歌以贈之凡六百一十二言命曰琵琶行

潯陽江頭夜送客楓葉荻花秋瑟瑟

半紅半白之貌

主人下馬

客在船舉酒欲飲無管絃醉不成歡慘將別別時茫茫江浸月忽聞水上琵琶聲主人忘歸客不發尋聲聞問彈者誰琵琶聲傳欲語遲移船相近邀相見添酒回燈

重開宴千呼萬喚始出來猶抱琵琶半遮面轉軸撥絃

三兩聲未成曲調先有情絃絃掩抑聲聲思似訴平生

不得志低眉信手續續彈說盡心中無限事輕攏

盧容切

慢撚乃珍切抹復挑初為霓裳後六么大絃嘈嘈如急雨

小絃切切如私語嘈嘈切切錯雜彈大珠小珠落玉盤

間關鶯語花底滑幽咽泉流水下灘水泉冷澁絃凝絕

凝絕不通聲暫歇別有幽愁闇恨生此時無聲勝有聲

銀餅乍破水漿迸鐵騎突出刀鎗鳴曲終收撥當心畫

四絃一聲如裂帛東船西舫悄無言唯見江心秋月白

沉吟放撥插絃中整頓衣裳起斂容自言本是京城女
家在蝦蟆陵下住十三學得琵琶成名屬教坊第一部
曲罷長教善才服粧成每被秋娘妬五陵年少爭纏頭
一曲紅綃不知數鈿頭銀篦擊節碎血色羅裙翻酒污
今年歡笑復明年秋月春風等閒度弟走從軍阿嬖死
暮去朝來顏色故門前冷落鞍馬稀老大嫁作商人婦
商人重利輕別離前月浮梁買茶去去來江口守空船

遶船明月江水寒夜深忽夢少年事夢啼粧淚紅闌干
我聞琵琶已嘆息又聞此語重唧唧同是天涯淪落人
相逢何必曾相識我從去年辭帝京謫居卧病潯陽城
潯陽地僻無音樂終歲不聞絲竹聲住近湓江地低濕
黃蘆苦竹遶宅生其間旦暮聞何物杜鵑啼血猿哀鳴
春江花朝秋月夜往往取酒還獨傾豈無山歌與村笛
嘔啞嘲哢難為聽今夜聞君琵琶語如聽仙樂耳暫明
莫辭更坐彈一曲為君翻作琵琶行感我此言良久立

却生促絃絃轉急淒淒不似向前聲滿座重聞皆掩泣
座中泣下誰最多江州司馬青衫濕

簡簡吟

蘇家小女名簡簡芙蓉花腮柳葉眼十一把鏡學點粧
十二抽針能綉裳十三行坐事調品不肯迷頭白地藏
玲瓏雲髻生花樣飄飄風袖薔薇香殊姿異態不可狀
忽忽轉動如有光二月繁霜殺桃李明年欲嫁今年死
丈人阿母勿悲啼此女不是凡夫妻恐是天仙謫人世

只合人間十三歲大都好物不堅牢綵雲易散琉璃脆
花非花

花非花霧非霧夜半來天明去來時春夢幾多時去似
朝雲無覓處

醉後狂言酬贈蕭殷二協律

餘杭邑客多羈貧其間甚者蕭與殷天寒身上猶衣葛
日高甑中未拂塵江城山寺十一月北風吹沙雪紛紛
賓客不見綈袍惠黎庶未沾襦袴恩此時太守自慙愧

重衣複衾有餘溫因命染人與針女先製兩裘贈二君
吳綿細軟桂布密柔如狐腋白似雲勞將詩書投贈我
如此小惠何足論我有大裘君未見寬廣和暖如陽春
此裘非繒亦非纊裁以法度絮以仁刀尺鈍拙製未畢
出亦不獨裹一身若令在郡得五考與君展覆杭州人

醉歌

示妓人
商玲瓏

罷胡琴掩秦瑟玲瓏再拜歌初畢誰道使君不解歌聽
唱黃雞與白日黃雞催曉丑時鳴白日催年酉時沒腰

間紅綬繫未穩鏡裡朱顏看已失玲瓏玲瓏奈老何使
君歌了汝更歌

白氏長慶集卷十二

白氏長慶集卷十三

唐白居易撰

律詩

五言七言自兩韻至一百韻凡九十九首

代書詩一百韻寄微之

憶在貞元歲初登典校司身名同日授心事一言知

貞元

中與微之同登科第俱授秘書省校書郎始相識也

肺腑都無隔形骸兩不羈疎

狂屬年少閒散為官卑分定金蘭契言通藥石規交賢

方汲汲友直每偲偲有月多同賞無盃不共持秋風拂

琴匣夜月卷書帷高上慈恩塔幽尋皇子陂唐昌玉蕊

會崇敬牡丹期唐昌觀玉蕊崇敬寺牡丹花時多與微之有期笑勸迂辛酒閒

吟短李詩辛大立度性迂嗜酒李二十紳體短能詩故當時有迂辛短李之號儒風愛敦

質佛理尚玄師劉三十二敦質有儒風度七玄師談佛理有可賞者度日曾無悶

通宵靡不為雙聲聯律句八面對宮基雙聲聯句八面宮基皆當時事

往往遊三省騰騰出九達寒銷直城路春到曲江池樹

暖枝條弱山晴彩翠奇峰攢石綠點柳宛麴塵絲岍草

煙鋪地園花雪壓枝早光紅照耀新溜碧逶迤幄幕侵
堤布盤筵占地施徵伶皆絕藝選妓悉名姬粉黛凝春
態金鈿耀水嬉風流誇墜髻時世鬪啼眉

貞元中城中復為墜馬髻

啼眉粧也密坐隨歡促華樽逐勝移香飄歌袂動醉落舞釵

遺籌插紅螺碗觥飛白玉卮打嫌調笑易飲訝卷波遲

拋打曲有調笑令飲酒曲有卷白波殘席諠譁散歸鞍酩酊騎酖顏烏帽

側醉袖玉鞭垂紫陌傳鐘鼓紅塵塞路岐幾時曾暫別
何處不相隨荏苒星霜換迴環節候催兩衙多請假三

考欲成資運偶千年聖天成萬物宜皆當少壯日同惜

盛明時光景嗟虛擲雲霄竊聞窺攻文朝矻矻講學夜

孜孜策目穿如札

時與微之集策畧之目其數百十

鋒毫銳若錐

時與微之

各有錢鋒細管筆携以就試相顧輒笑目為毫維

繁張獲鳥網堅守釣魚坻

陳知

切謂自冬至夏頻改試期竟與微之堅守制試也

並受夔龍薦齊陳晁董詞萬

言經濟畧三策太平基中第爭無敵專場戰不疲輔車

排勝陣掎角牽降旗

並謂同鋪席共華視

雙闕紛容衛千僚儼等

衰謂制舉人欲思隨紫泥降名向白麻披既在高科選

唱第之時也

還從好爵縻東垣君諫諍西邑我驅馳

元和元年同登制科徵之拜拾

遺予授
監厓尉

再喜登烏府多慚侍赤墀

四年徵之復拜監察
予為拾遺學士也

官班分內外遊處遂參差每列鵷鷺序偏瞻獬豸姿簡

威寒凜冽衣綵綉葳蕤正色摧強禦剛腸嫉喔咻常憎

持祿位不擬保妻兒養勇當除惡輸忠在滅私下韞

居侯

切驚燕雀當道懾狐狸南國人無怨東臺更不欺

徵之
使東

原奏寬八十餘家詔從
而平之因分司東都

理寬多定國切諫甚辛毘造次

行於是平生志在茲道將心共直言與行兼危水間波

翻覆山藏路險巇未為明主識已被倖臣疑木秀遭風折
蘭芳遇露萎千鈞勢易壓一柱力難支騰口因成瘡
羽委切吹毛遂得疵憂來吟貝錦謫去詠江離邂逅塵中

遇殷勤馬上辭賈生離魏闕王粲向荆夷水過清源寺
山經綺季祠心搖漢皋珮淚墮峴亭碑

並途中所歷處也驛路

緣雲際城樓枕水湄思鄉多繞澤望闕獨登陴林晚青
蕭索江平綠渺瀰野秋鳴蟋蟀沙冷聚鸕鷀官舍黃茅
屋人家苦竹籬白醪充夜酌紅粟備晨炊寡鶴摧風翮

鰥魚失水鬚

渠宜切

閭雛啼渴旦涼葉墜相思

此四句兼含微之鰥

居之一思

一點寒燈滅三聲曉角吹藍衫經雨故驄馬卧霜

羸念涸誰濡沫嫌醒自歎醺

鄰溪切

耳垂無伯樂舌在有

張儀負氣衝星劍傾心向日葵金言自銷鑠玉性肯磷

緇伸屈須看螻窮通莫問龜定知身是患當用道為醫

想子今如彼嗟子獨在斯無慘

連條切

當歲杪有夢到天

涯坐阻連襟帶行乖接履綦潤銷衣上霧香散室中芝

念遠緣遷貶驚時為別離素書三往復明月七盈虧

自與

微之別經七
月三度得書
舊里非難到
餘歡不可追
樹依興善老草

傍靜安衰

微之宅在靜安坊西近興善寺

前事思如昨
中懷寫向誰
北

村尋古柏南宅訪辛夷

開元西北院即隋時龍村佛堂有古柏一枝至今存焉微之宅

中有辛夷兩樹常與微之遊息其下

此日空搔首
何人共解頤
病多知夜

永年長覺秋悲不飲長如醉
加餐亦似飢
狂吟一千字

因使寄微之

和鄭元及第後秋歸洛下閒居

同高侍郎下隔年及第

勤苦成名後
優遊得意間
玉憐同匠琢
桂恨隔年攀
山

靜豹難隱谷幽鶯暫還微吟詩引步淺酌酒開顏門迴
暮臨水窓深朝對山雲衢日相待莫誤許身閒

與諸同年賀座主侍郎新拜太常同宴蕭尚書

亭子

座主與蕭尚書下
及第得羣字韻

寵新卿典禮會盛客徵文不失遷鶯侶因成賀燕群池
臺晴間雪冠蓋暮和雲共仰曾攀處年深桂尚薰

東都冬日會諸同年宴鄭家林亭

得先
字

盛時陪上第暇日會羣賢桂折因同樹鶯遷各異年賓

階紛組珮妓席儼花鈿促膝齊貧賤差肩次後先助歌
林下水銷酒雪中天他日升沉者無忘共此筵

叙德書情四十韻上宣歙翟中丞

宣州薦送及
第後重投此

詩

元聖生乘運忠賢出應期還將稽古力助立太平基土
控吳兼越州連歙與池山河地襟帶軍鎮國藩維廉察
安江甸澄清肅海夷股肱分外守耳目付中司楚老歌
來暮秦人詠去思望如時雨至福是歲星移政靜民無

訟刑行吏不欺撫謙驚主寵陰德畏人知白玉慙溫色
朱繩讓直辭行為時領袖言作世著龜盛幕招賢士連
營訓銳師光華下鵷鷺氣色動熊羆出入麾幢引登臨
劒戟隨好風迎解榻美景待摩帷晴野霞飛綺春郊柳
宛絲城鳥驚畫角江鴈避紅旗藉草朱輪駐攀花紫綬
垂山宜謝公屐洲稱柳家詩酒氣和芳杜絃聲亂子規
分毬齊馬首列舞匝蛾眉醉惜年光晚歡憐日影遲迴
塘排玉棹歸路擁金羈自顧龍鍾者嘗蒙噢咻之仰山

塵不讓涉海水難為身忝鄉人薦名因國士推提攜增
善價拂拭長妍姿射策端心術遷喬整羽儀幸穿楊遠
葉謬折桂高枝佩德潛書帶銘仁閭勒肌鞠躬趨館舍
拜手挹階墀霄漢程雖在風塵迹尚卑弊衣羞素布敗
屋壓茅茨養乏晨昏膳居無伏臘資歲時貧可恥壯歲
病堪嗤擢第名方立耽書力未疲磨鉛重剗朱緣切割策
寒再奔馳相馬須憐瘦呼鷹正及飢扶搖重即事會有
答恩時

和渭北劉大夫借便秋遮虜寄朝中親友

巨鎮為邦屏全材作國楨韜鈴漢上將文墨魯諸生豹
虎關西卒金湯渭北城寵深初受榮威重正揚兵陣占
山河布軍由水草行夏苗侵部落宵遁失藩營雲隊
攢戈戟風馳卷旆旌堆空烽火滅氣勝鼓聲鳴胡馬辭
南牧周師罷北征迴頭問天下何處有欃槍

抽庚切

題故曹王宅

宅在檀溪

甲第何年置朱門此地開山當賓閣出溪繞妓堂迴覆

井桐新長蔭窓竹舊栽池荒紅蕖苔砌老綠莓苔捐館
梁王去思人楚客來西園飛蓋處依舊月徘徊

自江陵之徐州路上作寄兄弟

岐路南將北離憂弟與兄關河千里別風雪一身行夕
宿勞鄉夢晨裝慘旅情家貧憂後事日短念前程煙鴈
翻寒渚霜鳥聚古城誰憐陟岡者西楚望南荆

酬哥舒大見贈

去年與哥舒等八人同
登科第今叙會散之意

去歲遊歡何處去

一作
好

曲江西岸杏園東花下忘歸因

美景樽前勸酒是春風
各從微宦風塵裏共度流年離
別中今日相逢愁又喜
八人分散兩人同

和談校書秋夜感懷呈朝中親友

選夜涼風楚客悲
清砧繁漏月高時
秋霜似鬢年空長
春草如袍位尚卑
詞賦擅名來已久
煙霄得路去何遲
漢庭卿相皆知已
不薦揚雄欲薦誰

感秋寄遠

惆悵時節晚
兩情千里同
離憂不散
處庭樹正秋風
燕

影動歸翼蕙香銷故叢佳期與芳歲牢落兩成空

春題華陽觀

觀即華陽公主故宅有舊內人存焉

帝子吹簫逐鳳皇空留仙洞號華陽落花何處堪惆悵頭白宮人掃影堂

大雨中贈元九

不堪紅葉青苔地又是涼風暮雨天莫怪獨吟秋思苦
比君校近二毛年

城中閒遊

寵辱憂歡不到情，任他朝市自營營。
獨尋秋景城東去，白鹿原頭信馬行。

答韋八

麗句勞相贈，佳期恨有違。
早知留酒待，悔不趁花歸。
春盡綠醅_{鋪杯切酒未清也}，老雨多紅萼。
稀今朝如一醉，猶得及芳菲。

華陽觀桃花時招李六拾遺飲

華陽觀裡仙桃發，把酒看花心自知。
爭忍開時不同醉。

明朝後日即空枝

和友人洛中感春

莫悲金谷園中月
莫歎天津橋上春
若學多情尋往事
人間何處不傷神

送張南簡入蜀

昨日詔書下求賢
訪陸沉無論能與否
皆起徇名心
君獨南遊去雲山蜀路深

寄陸補闕

前年同登科

忽憶前年科第後此時雞鶴暫同羣
秋風惆悵須吹散雞在庭前鶴在雲

華陽觀中八月十五日夜招友翫月

人道秋中明月好欲邀同賞意如何
華陽洞裏秋壇上今夜清光此處多

曲江憶元九

春來無伴閒遊少行樂三分減二分
何況今朝杏園裏閒人逢盡不逢君

過劉三十二故宅

不見劉君來近遠
門前兩度滿枝花
朝來惆悵宣平過
柳巷當頭第一家

下邳莊南桃花

村南無限桃花發
唯我多情獨自來
日暮風吹紅滿地
無人解惜為誰開

三月三十日題慈恩寺

慈恩春色今朝盡
盡日徘徊倚寺門
惆悵春歸留不得

紫藤花下漸黃昏

看憚家牡丹花戲贈李二十

香勝燒蘭紅勝霞城中最數令公家人人散後君須看
歸到江南無此花

春中與盧四周鯨華陽觀同居

性情懶慢好相親門巷蕭條稱作鄰背燭共憐深夜月
蹋花同惜少年春杏壇住僻雖宜病芸閣官微不救貧
文行如君尚憔悴不知霄漢待何人

自城東至以詩代書戲招李六拾遺崔二十六
先輩

青門走馬趁心期惆悵歸來已校遲
應過唐昌玉蕊後猶當崇敬牡丹時
暫遊還憶崔先輩欲醉先邀李拾遺
尚殘半月芸香俸不作歸糧作酒資

盤屋縣北樓望山

自此後詩
為尉時作

一為趨走吏塵土不開顏孤負平生眼
今朝始見山

縣西郊秋寄贈馬造

紫閣峯西清渭東野煙深處夕陽中風荷老葉蕭條綠
水蓼殘花寂寞紅我厭宦遊君失意可憐秋思兩心同
別韋蘇州

百年愁裏過萬感醉中來惆悵城西別愁眉兩不開

戲題新栽薔薇

時尉
盤屋

移根易地莫憔悴野外庭前一種春少府無妻春寂寞
花開將爾當夫人

酬王十八李大見招遊山

自憐幽會心期阻復愧嘉招書信頻王事牽身去不得
滿山松雪屬他人

縣南花下醉中留劉五

百歲幾迴同酩酊一年今日最芳菲願將花贈天台女
留取劉郎到夜歸

宿楊家

楊氏弟兄俱醉卧披衣獨起下高齋夜深不語中庭立
月照藤花影下堦

醉中留別楊六兄弟

三月二十日別

春初攜手春深散無日
花間不醉狂別後何人堪共醉
猶殘十日好風光

醉中歸塾屋

金光門外昆明路半醉騰騰信馬迴
數日非關王事繫
牡丹花盡始歸來

遊雲居寺贈穆三十六地主

亂峰深處雲居路共蹋花行獨惜春
勝地本來無定主

大都山屬愛山人

和王十八薔薇澗花時有懷蕭侍御兼見贈

霄漢風塵俱是繫薔薇花委故山深
憐君獨向澗中立一把紅芳三處心

再因公事到駱口驛

今年到時夏雲白去年來時秋樹紅
兩度見山心有愧皆因王事到山中

期李二十文畧王十八質夫不至獨宿仙遊寺

文畧也從牽吏役質夫何故戀
萬塵始知解愛山中宿
千萬人中無一人

酬趙秀才贈新登科諸先輩

莫羨蓬萊鸞鵠侶道成羽翼自生身
君看名在丹臺者
盡是人間修道人

過天門街

雪盡終南又欲春
遙憐翠色對紅塵
千車萬馬九衢上
迴首看山無一人

惜玉蕊花有懷集賢王校書起

芳意將闌風又吹白雲離葉雪辭枝集賢讐校無閒日
落盡瑤花君不知

春送盧秀才下第遊太原謁嚴尚書

未將時會合且與俗浮沉鴻養青冥翮蛟潛雲雨心煙
郊春別遠風磧暮程深墨客投何處并州舊翰林

長安送柳大東歸

白社羈遊伴青門遠別離浮名相引住歸路不同歸

送文暢上人東遊

得道即無著，隨緣西復東。
貌依年臘老，心到夜禪空。
山宿馴溪虎，江行瀟良據切水蟲。
悠悠塵客思，春滿碧雲中。

社日關路作

晚景函關路，涼風社日天。
青巖新有燕，紅樹欲無蟬。
愁立驛樓上，厭行官堠前。
蕭條秋興苦，漸近二毛年。

重到毓村宅有感

欲入中門淚滿巾，
庭花無主兩迴春。
軒窗簾幕皆依舊，

只是堂前欠一人

亂後過流溝寺

九月徐州新戰後悲風殺氣滿山河
唯有流溝山下寺門前依舊白雲多

歎髮落

多病多愁心自知行年未老髮先衰
隨梳落去何須惜不落終須變作絲

留別吳七正字

成名共記甲科上署吏同登芸閣間唯是塵心殊道性
秋蓬常轉水長閒

除夜宿洺州

家寄關西住身為河北遊蕭條歲除夜旅泊在洺州

邯鄲冬至夜思家

邯鄲夜裏逢冬至抱膝燈前影伴身想得家中夜深坐
還應說著遠行人

冬至夜懷湘靈

豔質無由見寒衾不可親何堪最長夜俱作獨眠人

感故張僕射諸妓

黃金不惜買蛾眉揀得如花三四枝歌舞教成心力盡
一朝身去不相隨

遊仙遊山

閻將心地出人間五六年來人怪閒自嫌戀着未全盡
猶愛雲泉多在山

見尹公亮新詩偶贈絕句

袖裏新詩十首餘
吟看句句是瓊琚
如何持此將干謁
不及公卿一字書

長安閒居

風竹煙松晝掩關
意中長似在深山
無人不怪長安住
何獨朝朝暮暮閒

早春獨遊曲江

時為校書郎

散職無拘束
羸驂少送迎
朝從直城出
春傍曲江行
風起池東暖
雲開山北晴
冰銷泉脉動
雪靜草芽生
露杏

紅初折煙楊綠未成影遲新度鴈聲泣欲啼鶯關地心
俱靜韶光眼共明酒狂憐性逸藥效喜身輕慵慢疎人
事幽樓逐野情迴看芸閣笑不似有浮名

秘書省中憶舊山

厭從薄宦校青簡悔別故山思白雲猶喜蘭臺非傲吏
歸時應免動移文

涼夜有懷

自此後詩並
未應舉時作

清風吹枕席白露濕衣裳好是相親夜漏遲天氣涼

送武士曹歸蜀

士曹即武中丞兄

花落鳥嚶嚶南歸稱野情
月宜秦嶺宿春好蜀江行
鄉路通雲棧郊扉近錦城
烏臺陟岡送人羨別時榮

江南送北客因憑寄徐州兄弟書

時年十五

故園望斷欲何如
楚水吳山萬里餘
今日因君訪兄弟
數行鄉淚一封書

賦得古原草送別

離離原上草一歲一枯榮
野火燒不盡春風吹又生
遠

芳侵古道晴翠接荒城又送王孫去萋萋滿別情

夜哭李夷道

逝者絕影響空庭朝復昏家人哀臨畢夜鑱壽堂門無
妻無子何人葬空見銘旌向月翻

病中作

時年十八

久為勞生事不學攝生道年少已多病此身豈堪老

秋江晚泊

扁舟泊雲島倚棹念鄉國四望不見人煙江澹秋色客

心貧易動日入愁未息

旅次景空寺宿幽上人院

不與人境接寺門開向山暮鐘鳴鳥聚秋雨病僧閒月
隱雲樹外螢飛廊宇間幸投花界宿暫得靜心顏

長安正月十五日

誼誼車騎帝王州羈病無心逐勝遊明月春風三五夜
萬人行樂一人愁

過高將軍墓

原上新墳委一身城中舊宅有何人
妓堂賓閣無歸日野草山花又欲春
門客空將感恩淚白楊風裏一霑巾

寒食卧病

病逢佳節長歎息春雨濛濛榆柳色
羸坐全非舊日容
扶行半是他人力
誼誼里巷蹋青歸
笑閉柴門度寒食

宿桐廬館同崔存度醉後作

江海漂漂共旅遊一樽相勸散窮愁
夜深醒後愁還在
雨滴梧桐山館秋

江樓望歸

時避難
在越中

滿眼雲水色月明樓上人旅愁春入越鄉夢夜歸秦道
路通荒服田園隔虜塵悠悠滄海畔十載避黃巾

除夜寄弟妹

感時思弟妹不寐百憂生萬里經年別孤燈此夜情病
容非舊日歸思逼新正早晚重歡會羈離各長成

寒食月夜

風香露重梨花濕草舍無燈愁未入南鄰北里歌吹時

獨倚柴門月中立

感為藥花寄正上人

今日階前紅芍藥
幾花欲老幾花新
開時不解比色相
落後始知如幻身
空門此去幾多地
欲把殘花問上人

晚秋閒居

地僻門深少送迎
披衣閒坐養幽情
秋庭不掃攜藤杖
閒蹋梧桐黃葉行

秋暮郊居書懷

郊居人事少晝卧對林巖窮巷厭多雨貧家愁早寒
葛衣秋未換書卷病仍看若問生涯計前溪一釣竿

為薛台悼亡

半死梧桐老病身重泉一念一傷神手攜稚子夜歸院
月冷房空不見人

途中寒食

路傍寒食行人盡

一作絕

獨占春愁在路傍馬上垂鞭愁

不語風吹百草野田香

題流溝寺古松

煙葉蔥蘢蒼鹿

居里切
鹿屬

尾霜皮剝落紫龍鱗欲知松老

看塵壁死却題詩幾許人

感月悲逝者

存亡感月一潸然月色今宵似往年何處曾經同望月
櫻桃樹下後堂前

代鄰叟言懷

人生何事心無定宿昔如今意不同宿昔愁身不得老

如今恨作白頭翁

自河南經亂關內阻飢兄弟離散各在一處因
望月有感聊書所懷寄上浮梁大兄於潛七
兄烏江十五兄兼示符離及下邳弟妹

時難年荒世業空弟兄羈旅各西東田園寥落干戈後
骨肉流離道路中弔影分為千里鴈辭根散作九秋蓬
共看明月應垂淚一夜鄉心五處同

長安早春旅懷

軒車歌吹諠都邑中有一人向隅立夜深明月卷簾愁
日暮青山望鄉泣風吹新綠草芽拆雨灑輕黃柳條濕
此生知負少年春不展愁眉欲三十

寒閨夜

夜半衾裯冷孤眠懶未能籠香銷盡火巾淚滴成冰為
惜影相伴通宵不滅燈

寄湘靈

淚眼凌寒凍不流每經高處即迴頭遥知別後西樓上

應凭闌干獨自愁

冬至宿楊梅館

十一月中長至夜三千里外遠行人
若為獨宿楊梅館
冷枕單床一病身

臨江送夏瞻

瞻年七十餘

悲君老別我霜巾七十無家萬里身
愁見舟行風又起
白頭浪裏白頭人

冬夜示敏巢

時在東都屯

爐火欲銷燈欲盡夜長相對百憂生
他時諸處重相見莫忘今宵燈下情

客中守歲

在柳家莊

守歲樽無酒思鄉淚滿巾始知為客苦
不及在家貧畏老偏驚節防愁預惡春
故園今夜裏應念未歸人

問淮水

自嗟名利客擾擾在人間何事長淮水
東流亦不閒

宿樟亭驛

夜半樟亭驛愁人起望鄉月明何所見潮水白茫茫

及第後憶舊山

偶獻子虛登上第却吟招隱憶中林春蘿秋桂莫惆悵
縱有浮名不繫心

題李次虛窓竹

不用栽為鳴鳳管不須截作釣魚竿千花百草凋零後
留向紛紛雪裡看

花下自勸酒

酒盞酌來湏滿滿花枝看即落紛紛莫言三十是年少
百歲三分已一分

題李十一東亭

相思夕上松臺立蛩思蟬聲滿耳秋惆悵東亭風月好
主人今夜在鄜州

春村

二月村園暖桑間戴勝飛農夫春舊穀盤螽蟴新衣牛
馬因風遠鷄豚過社稀黃昏林下路鼓笛賽神歸

題施山人野居

得道應無著謀生亦不妨
春泥秧稻暖夜火焙茶香水
巷風塵少松齋日月長
高閒真是貴何處覓侯王

白氏長慶集卷十三

謹案卷十二第三頁前七行金殿照耀石甕寺按

全唐詩殿作鈔

第四頁前一行修行坊西鼓聲絕按別本修作循
第十一頁後五行世間尤物難留連難留連易銷
歇刊本尤訛有又脫難留連三字據全唐詩改
增

第二十三頁前八行黎庶未沾襦袴恩刊本襦訛
襦據全唐詩改

卷十三第六頁後七行呼鷹正及飢刊本鷹訛鷺

據全唐詩改

第七頁前行何處有橈槍刊本橈槍訛槍橈據

全唐詩改





總校官庶吉士臣張能照

校對官編修臣沈清藻

膳錄監生臣劉震

欽定四庫全書薈要

集部

白氏長慶集卷十四

五

臣
王杰詳校
詳校官助教臣常循



白氏長慶集卷十四

唐白居易撰

律詩

五言七言自兩韻至一百韻凡一百首

翰林中送獨孤二十七起居罷職出院

碧落留雲住青冥放鶴還銀臺向南路從此到人間

重尋杏園

忽憶芳時頻酩酊却尋醉處重徘徊杏花結子春深後

誰解多情又獨來

曲江獨行

自此後詩在翰林時作

獨來獨去何人識
廢馬朝衣野客心
閒愛無風水邊坐
楊花不動樹陰陰

同李十一醉憶元九

花時同醉破春愁
醉折花枝作酒籌
忽憶故人天際去
計程今日到涼州

同錢員外題絕糧僧巨川

三十年來坐對山唯將無事化人間齋時往往聞鐘笑
一食何如不食閒

絕句代書贈錢員外

欲尋秋景閒行去君病多慵我興孤可惜今朝山最好
強能騎馬出來無

晚秋有懷鄭中舊隱

天高風嫋嫋鄉思繞關河寥落歸山夢殷勤採蕨歌病
添心寂寞愁入鬢蹉跎晚樹蟬鳴少秋階日上多長閒

羨雲鶴久別愧煙蘿其奈丹墀上君恩未報何

禁中九日對菊花酒憶元九

賜酒盈杯誰共持宮花滿把獨相思相思只傍花邊立

盡日吟君詠菊詩

元詩云不是花中偏愛菊此花開盡更無花

送王十八歸山寄題仙遊寺

曾於太白峰前住數到仙遊寺裏來黑水澄時潭底出
白雲破處洞門開林間暖酒燒紅葉石上題詩掃綠苔
惆悵舊遊無復到菊花時節羨君迴

荅張籍因以代書

憐君馬瘦衣裘薄
許到江東訪鄙夫
今日正閒天又暖
可能扶病暫來無

曲江早春

曲江柳條漸無力
杏園伯勞初有聲
可憐春淺遊人少
好傍池邊下馬行

見元九悼亡詩因以此寄

夜淚闇銷明月幌
春觴遙斷牡丹庭
人間此病治無藥

唯有楞伽四卷經

寒食夜

無月無燈寒食夜夜深猶立闌花前忽因時節驚年幾
四十如今欠一年

杏園花落時招錢員外同醉

花園欲去去應遲正是風吹狼藉時近西數樹猶堪醉
半落春風半在枝

重題西明寺牡丹

時元九
在江陵

往年君向東都去，曾歎花時君未迴。
今年況作江陵別，惆悵花前又獨來。
只愁離別長如此，不道明年花不開。
同錢員外禁中夜直

宮漏三聲知半夜，好風涼月滿松筠。
此時閒坐寂無語，藥樹影中唯兩人。

禁中夜作書與元九

心緒萬端書兩紙，欲封重讀意遲遲。
五聲宮漏初鳴後，一點窓燈欲滅時。

八月十五日夜禁中獨直對月憶元九

銀臺金闕夕沉沉獨宿相思在翰林三五夜中新月色
二千里外故人心渚宮東面煙波冷浴殿西頭鐘漏深
猶恐清光不同見江陵卑濕足秋陰

寄陳式五兄

年來白髮兩三莖憶別君時髭未生惆悵料君應滿鬢
當初是我十年兄

庾順之以紫霞綺遠贈以詩答之

千里故人心鄭重一端香綺紫氛氲開緘日映晚霞色
滿幅風生秋水紋為褥欲裁憐葉破製裘將剪惜花分
不如縫作合歡被寤寐相思如對君

送元八歸鳳翔

莫道岐州三日程其如風雪一身行與君况是經年別
暫到城來又出城

雨雪放朝因懷微之

歸騎紛紛滿九衢放朝三日為泥塗不知雨雪江陵府

今日排衙得免無

詠懷

歲去年來塵土中
眼看變作白頭翁
如何辦得歸山計
兩項村田一畝宮

聞微之江陵卧病以大通中散碧腴垂雲膏寄之因題四韻

已題一帖紅消散
又封一合碧雲英
憑人寄向江陵去
道路迢迢一月程
未必能治江上瘴
且圖遙慰病中情

到時想得君拈得枕上開看眼暫明

酬錢員外雪中見寄

松雪無塵小院寒閉門不似住長安煩君想我看心坐
報道心空無可看

重酬錢員外

雪中重寄雪山偈問答殷勤四句中本立空名緣破妄
若能無妄亦無空

獨酌憶微之

時對所
贈益

獨酌花前醉憶君與君春別又逢春惆悵銀杯來處重
不曾盛酒勸閒人

微之宅殘牡丹

殘紅零落無人賞雨打風吹花不全諸處見時猶悵望
況當元九小庭前

新磨鏡

衰容當晚節秋鏡偶新磨一與清光對方知白髮多鬢
毛從幻化心地付頭陀任意渾成雪其如似夢何

感髮落

昔日愁頭白誰知未白衰眼看應落盡無可變成絲

八月十五日夜聞崔大員外翰林獨直對酒翫
月因懷禁中清景偶題是詩

秋月空懸高碧外仙郎靜翫禁闌間歲中唯有今宵好
海內無如此地閒皓色分明雙闕勝清光深到九門關
遥聞獨醉還惆悵不見金波照玉山

酬王十八見寄

秋思太白峯頭雪晴憶仙遊洞口雲未報皇恩歸未得
慙君為寄北山文

立春日酬錢員外曲江同行見贈

下直遇春日垂鞭出禁闈兩人攜手語十里看山歸柳
色早黃淺水紋新綠微風光向晚好車馬近南稀機盡
笑相顧不驚鷗鷺飛

和錢員外青龍寺上方望舊山

舊峰松雪舊溪雲惆望今朝還屬君共道使臣非俗吏

南山莫動北山文

宴周皓大夫光福宅

座上作

何處風光最可憐
妓堂階下砌臺前
軒車擁路光照地
絲管入門聲沸天
綠蔥不香饒桂酒
紅櫻無色讓花鈿
野人不敢求他事
唯借泉聲伴醉眠

晚秋夜

碧空溶溶月華靜
月裡愁人弔孤影
花開殘菊傍疎籬
葉下衰桐落寒井
塞鴻飛急覺秋盡
鄰鷄鳴遲知夜永

凝情不語空所思
風吹白露衣裳冷

惜牡丹花二首

一首翰林院北廳花下作一首
新昌寶給事中宅南亭花下作

惆悵階前紅牡丹
晚來唯有兩枝殘
明朝風起應吹盡
夜惜衰紅把火看

寂寞萎紅低向雨
離披破豔散隨風
晴明落地猶惆悵
何況飄零泥土中

荅元奉禮同宿見贈

相逢俱歎不聞身
直日常多齋日頻
晚鼓一聲分散去

明朝風景屬何人

答馬侍御見贈

謬入金門侍玉除
煩君問我意何如
蟠木詎堪明主用
籠禽徒與故人踈
苑花似雪同隨輦
宮月如眉伴直廬
淺薄求賢思自代
嵇康莫寄絕交書

上元日恩賜曲江宴會即事

賜歡仍許醉此會
興如何翰苑主恩重
曲江春意多花
低羞豔妓顰散讓
清歌共道昇平樂
元和勝永和

夜惜禁中桃花因懷錢員外

前日歸時花正紅
今夜宿時枝半空
坐惜殘芳君不見
風吹狼籍月明中

和錢員外早冬翫禁中新菊

禁署寒氣遲
孟冬菊初拆
新黃間繁綠
爛若金照碧
仙郎小隱日
心似陶彭澤
秋憐潭上看
日慣籬邊摘
今來此地賞
野意潛自適
金馬門內花
玉山峰下客
寒芳引清句
吟翫煙景夕
賜酒色偏宜
握蘭香不敵
淒淒百卉

死歲晚冰霜積唯有此花開殷勤助君惜

錢嘗居藍田山下故云

答劉戒之早秋別墅見寄

涼風木槿籬暮雨槐花枝併起新秋思為得故人詩
避地鳥擇木入朝魚在池城中與山下喧靜闇相思

涼夜有懷

念別感時節早蛩聞一聲風簾夜涼入露簟秋意生
燈盡夢初罷月斜天未明闇凝無限思起傍藥欄行

秋思

病眠夜少夢閒立秋多思寂寞餘雨晴蕭條早寒至
鳥棲紅葉樹月照青苔地何況鏡中年又過三十二

禁中聞蛩

悄悄禁門閉夜深無月明西窓獨闇坐滿耳新蛩聲

秋蟲

切切闇窓下嚶嚶

伊亮切

深草裏秋天思婦心雨夜愁人

耳

贈別宣上人

上人處世界清淨何所似似彼白蓮花在水不着水性
真悟泡幻行潔離塵滓修道來幾時身心俱到此嗟予
牽世網不得長依止離念與碧雲秋來朝夕起

春夜喜雪有懷王二十二

夜雪有佳趣幽人出書帷微寒生枕席輕素對階墀坐
罷楚絃曲起吟班扇詩明宜滅燭後淨愛褰簾時窓引
曙色早庭銷春氣遲山陰應有興不卧待微之

酬和元九東川路詩十二首

并序

十二篇皆因新境追惟舊事不能一一曲叙但隨而和之唯予與元微之耳

駱口驛舊題詩

拙詩在壁無人愛
鳥汙苔侵文字殘
唯有多情元侍御
繡衣不惜拂塵看

南秦雪

往歲曾為西邑吏
慣從駱口到南秦
三時雲冷多飛雪
二月山寒少有春
我思舊事猶惆悵
君作初行定苦辛

仍賴愁猿寒不叫若聞猿叫更愁人

山枇杷花二首

萬重青嶂蜀門口一樹紅花山頂頭
春盡憶家歸未得低紅如解替君愁

葉如裙色碧紗淺花似芙蓉紅粉輕
若使此花兼解語推囚御史定違程

江樓月

嘉陵江曲曲江池明月雖同人別離
一宵光景潛相憶

兩地陰晴遠不知誰料江邊懷我夜正當池畔望君時
今朝共語方同悔不解多情先寄詩

亞枝花

山郵花木似平陽愁殺多情驄馬郎還似昇平池畔坐
低頭向水自看粧

江上笛

江上何人夜吹笛聲聲似憶故園春此時聞者堪頭白
況是多愁少睡人

嘉陵夜有懷二首

露濕墻花春意深
西廊月上半床陰
憐君獨卧無言語
惟我知君此夜心

不明不闇朦朧月
非暖非寒慢慢風
獨臥空牀好天氣
平明閒事到心中

夜深行

百年關外夜行客
三殿角頭宵直人
莫道近臣勝遠使
其時同是不閒身

望驛臺

三月三十日

靖安宅裏當窓柳
望驛臺前撲地花
兩處春風同日盡
居人思客客思家

江岸梨

梨花有意緣和葉
一樹江頭惱殺君
最似嬌閨少年婦
白粧素袖碧紗裙

荅謝家最小偏憐女
感元九悼亡詩因為代荅

三首

嫁得梁鴻六七年，耽書愛酒日高眠。
雨荒春圃唯生草，雪壓朝厨未有煙。
身病憂來緣女少，家貧忘却為夫賢。
誰知厚俸今無分，枉向秋風吹紙錢。

荅騎馬入空臺

君入空臺去，朝往暮還來。
我入泉臺去，泉門無復開。
鰥夫仍繫職，稚女未勝哀。
寂寞咸陽道，家人覆墓迴。

荅山驛夢

入君旅夢來千里，閉我幽魂欲二年。
莫忘平生行坐處，

後堂階下竹叢前

和元九與呂二同宿話舊感贈

見君新贈呂君詩憶得同年行樂時爭入杏園齊馬首
潛過柳曲關蛾眉八人雲散俱遊宦七度花開盡別離
聞道秋娘猶且在至今時復問微之

憶元九

渺渺江陵道相思遠不知近來文卷裏半是憶君詩

蕭員外寄新蜀茶

蜀茶寄到但驚新渭水煎來始覺珍滿甌似乳堪持翫
况是春深酒渴人

寄上大兄

已後詩在
郵林居作

秋鴻過盡無書信病戴紗巾強出門獨上荒臺東北望
日西愁立到黃昏

病中哭金鑾子

小女
子名

豈料吾方病翻悲汝不全卧驚從枕上扶哭就燈前有
女誠為累無兒豈免憐病來纔十日養得已三年慈淚

隨聲迸悲傷遇物牽故衣猶架上殘藥尚頭邊送出深
村巷看封小墓田莫言三里地此別是終天

寄內

桑條初綠即為別柿葉半紅猶未歸不如村婦知時節
解為田夫秋擣衣

病氣

自知氣發每因情情在何由氣得平若問病根深與淺
此身應與病齊生

歎元九

不入城中來五載同時班列盡官高何人牢落猶依舊
唯有江陵元士曹

眼暗

早年勤倦看書苦晚歲悲傷出淚多眼損不知都自取
病成方悟欲如何夜昏乍似燈將滅朝闇長疑鏡未磨
千藥萬方治不得唯應閉目學頭陀

得袁相書

穀苗深處一農夫面黑頭斑手把鋤何意使人猶識我
就田來送相公書

病中作

病來城裏諸親故厚薄親疎心總知唯有蔚章於我分
深於同在翰林時

感化寺見元九劉三十二題名處

微之謫去千餘里太白無來十一年今日見名如見面
塵埃壁上破窓前

遊悟貞寺廻山下別張殷衡

世緣未了治不得孤負青山心共知愁君又入都門去
即是紅塵滿眼時

村居寄張衡

金氏村中一病夫生涯瀟落性靈迂唯看老子五千字
不蹋長安十二衢藥銚徒平切夜傾殘酒暖竹床寒取舊

甌鋪聞君欲發江東去能到茅菴訪別無

病中得樊書

荒村破屋經年卧寂絕無人問病身唯有東都樊著作
至今書信尚殷勤

開元九詩書卷

紅箋白紙兩三束半是君詩半是書經年不展緣身病
今日開看生蠹魚

晝卧

抱枕無言語空房獨悄然誰知盡日卧非病亦非眠

夜坐

度前盡日立到夜燈下有時坐徹明此情不語何人會
時復長吁一兩聲

暮立

黃昏獨立佛堂前滿地槐花滿樹蟬大抵四時心總苦
就中腸斷是秋天

有感

絕絃與斷絲猶有却續時唯有衷腸斷無應續得期

答友問

似玉童顏盡如霜病髮新莫驚身頓老心更老於身

村夜

霜草蒼蒼蟲切切村南村北行人絕獨出門前望野田
月明蕎麥花如雪

聞蟲

聞蟲唧唧夜繚繚況是秋陰欲雨天猶恐愁人暫得睡
聲聲移近卧床前

寒食夜有懷

寒食非長非短夜春風不熱不寒天可憐時節堪相憶
何況無燈各早眠

贈內

漠漠闇苔新雨地微微涼露欲秋天莫對月明思往事
損君顏色減君年

得錢舍人書問眼疾

春來眼闇少心情點盡黃連尚未平唯得君書勝得藥
開緘未讀眼先明

金安四
卷十四
還李十一馬

傳語李君勞寄馬病來唯拄杖持身縱擬強騎無出處
却將牽與趁朝人

九日寄行簡

摘得菊花攜得酒遠村騎馬思悠悠下邳田地平如掌
何處登高望梓州

夜坐

斜月入前楹迢迢夜坐情梧桐上階影蟋蟀近牀聲曙

傍窓閒至秋從簾上生感時因憶事不寢到鷄鳴

村居二首

田園莽蒼經春早籬落蕭條盡日風若問經過談笑者
不過田舍白頭翁

門閉仍逢雪厨寒未起煙貧家重寥落半為日高眠
早春

雪散因和氣冰開得暖光春銷不得處唯有髮邊霜
和夢遊春詩一百韻并序

微之既到江陵又以夢遊春詩七十韻寄予且題其序
曰斯言也不可使不知吾者知知吾者亦不可使不知
樂天知吾也吾不敢不使吾子知予辱斯言三復其旨
大抵悔既往而悟將來也然子以為苟不悔不寤則已
若悔於此則宜悟於彼也反於彼而悟於妄則宜歸於
真也況與足下外服儒風內宗梵行者有日矣而今而
後非覺路之返也非空門之歸也將安反乎將安歸乎
今所和者其章旨卒歸於此夫感不甚則悔不熟感不

至則悟不深故廣足下七十韻為一百韻重為足下陳
夢遊之中所以甚感者叙婚仕之際所以至感者欲使
曲盡其妄周知其非然後返乎真歸乎實亦猶法華經
序火宅偈化城維摩經入娑舍過酒肆之義也微之微
之予斯文也猶不可使不知吾者知幸藏之云爾

昔君夢遊春夢遊仙山曲恍若有所遇似愜平生欲因
尋菖蒲水漸入桃花谷到一紅樓家愛之看不足池流
渡清洲

雖氏切

草嫩蹋綠蓍門柳闇全低簷櫻紅半熟轉

行深深院過盡重重屋烏龍卧不驚青鳥飛相逐漸聞

玉珮響始辨珠履躅遙見窓下人娉婷十五六霞光抱

明月蓮豔開初旭縹緲雲雨仙氛氲蘭麝馥風流薄梳

洗時世寬粧束袖軟

乳充切
柔也

異文綾裾輕單絲縠裙腰

銀線壓梳掌金筐戲帶纈紫蒲萄袴花紅石竹凝情都

未語付意微相矚眉斂遠山青鬟低片雲綠帳牽翡翠

帶被解鴛鴦襪

博木切

秀色似堪食穠華如可掬半卷錦

頭席斜鋪繡腰褥朱脣素指勻粉汗紅綿撲心驚睡易

覺夢斷魂難續籠委獨樓禽
劍分連理木存誠期有感

誓志貞無黷京洛八九春
未曾花裏宿壯年徒自棄佳

會應無復鸞歌不重聞鳳兆
從茲卜韋門女清貴裴氏

甥賢淑羅扇夾花燈金鞍攢
繡轂既傾南國貌遂坦東

床腹劉阮心漸忘潘楊意方
睦新修履信第初食尚書

祿九醞備聖賢八珍窮水陸
秦家重蕭史彥輔憐衛叔

朝饌饋獨盤夜醪傾百斛親
賓盛輝赫妓樂紛曄涉切

煜余六切宿醉纔解醒朝歡俄枕
麴飲過君子爭令甚將

軍酷酩酊歌鷓鴣顛狂舞鵲

音鳥音
勛谷欲

月流春夜短日下

秋天速謝傳隙過駒蕭娘風送燭全凋薜花折半死梧

桐禿閣鏡對孤鸞哀絃留寡鵠淒淒隔幽顯冉冉移寒

燠萬事此時休百身何處贖提攜小兒女將領舊姻族

再入朱門行一傍青樓哭握空無廢馬水涸失池鰲

莫

切鴨也 揺落廢井梧荒涼故籬菊萼上几闌塵土生琴

筑

張六切似
第十三紐

舞榭綴螭蛸歌梁聚蝙蝠嫁分紅粉妾賣

散蒼頭僕門客思徬徨家人泣伊噢心期正蕭索官序

仍拘跼懷策入嶠函驅車辭郊鄆逢時念既濟聚學思
大畜端詳筮仕著磨拭穿楊鏃始從讎校職首中賢良
目一拔侍瑤墀再升紆繡服誓酬君王寵願使朝廷肅
密勿奏封章清明操憲牘鷹鷂中病下豸角當邪觸紕
謬盡東周申寃動南蜀危言詆閭寺直氣忤鈞軸不忍
曲作鈎乍能折為玉捫心無愧畏騰口有謗譏只要明
是非何曾虞禍福車摧太行路劒落豐城獄襄漢問修
途荆蠻指殊俗謫為江府掾遣事荊州牧趨走謁麾幢

枯江切喧煩視鞭扑簿書常自領縲囚每親鞫竟日坐官

曹經旬曠休沐宅荒渚宮草馬瘦畬田粟薄俸等涓毫

微官同桎梏月中照形影天際辭骨肉鶴病翅羽垂獸

窮爪牙縮行看鬚間白誰勸盃中綠時傷大野麟命問

長沙鵬夏梅山雨漬秋瘴海雲毒巴水白茫茫楚山青

簇簇吟君七十韻是我心所蓄既去誠莫追將來幸前

勗欲除憂惱病當取禪經讀須悟事皆空無令念將屬

請思遊春夢此夢何閃倏式竹切豔色即空花浮生乃焦

穀良姻在佳偶頃刻為單獨入仕欲榮身須更成熟辱
合者離之始樂兮憂所伏愁恨僧祇長歡榮刹那促覺
悟因傍喻迷執由當局膏明誘闇蛾陽焱以贈切奔癡鹿
貪為苦聚落愛是悲林麓水蕩無明波輪迴死生輻塵
應甘露灑垢待醍醐浴障要智燈燒魔須慧刀戮外熏
性易染內戰心難刃女六切法句與心玉期君日三復微之
常以法句及心玉頭陀經
相示故申言以卒其志也

王昭君二首

時年十七

滿面胡沙滿髮風眉銷殘黛臉銷紅愁苦辛勤憔悴盡
如今却是畫圖中

漢使却迴憑寄語黃金何日贖蛾眉君王若問妾顏色
莫道不如宮裏時

白氏長慶集卷十四